

ՎԻՄԱԳՐԱԿԱՆ**ԽՈԳՆԱՎԱՐԻ ՅՈՒՇԱՐՁԱՆՆԵՐԸ**

Խոգնավար գիւղի վիմագրական ժառանգութեան ուսումնասիրութիւնը դուրս է մնացել ուսումնասիրողների տեսադաշտից: Սոյն յօդուածի նպատակն է դաշտային, արխիւային եւ մատենագիտական նիւթերի հիման վրայ ներկայացնել գիւղի համառօտ պատմութիւնն ու պատմական յուշարձանները: Խոգնավարը (յայտնի նաեւ՝ Խաղնավար, Խանձաբերդ, Խզնավար, Խոգնավուր անուններով), գտնուում է ՀՀ Սիւնիքի մարզում, Գորիս քաղաքից 11 կմ հիւսիս: 1490 թուականին արտագրուած մի ձեռագրի յիշատակարանում այն ներկայացնում է որպէս Սիւնիքի Աղահէճքի մասը կազմող Քաշաթաղ գաւառի գիւղերից մէկը: Տաթեւի վանքի նոր հարկացուցակի համաձայն վանքին տալիս էր 4400 դահեկան պտղի հարկ¹: Գիւղը բազմաթիւ անգամներ ենթարկուել է ասպատակութիւնների, այսպէս. «1913 թուի Մարտի 16-ին քոչուոր թարաքամա ցեղն անսպասելի յարձակում է գիւղի վրայ, կողոպտում: Նրանք յափշտակում են նաեւ Սբ. Ստեփանոս եկեղեցում պահպանուող 200-ից ավելի հնագոյն գրչագրեր եւ վառում»²: Գիւղի մասին հնարաւոր եղաւ տեղեկութիւններ գտնել նաեւ մամուլի էջերում՝ թրդթակցութիւնների տեսքով, որտեղ գիւղն ունի հետեւեալ նկարագիրը. «Գիւղացոց մեծ մասը գաղթականներ են. նրանք գաղթել են Փոքր Սիւնիքի (Ղարաբաղ) և Մեծ Սիւնիքի զանազան գիւղերից, օրինակ Յարութիւնեանները գաղթել են Տիգակից, Մէլիք-Յեգանեան ժառանգութիւնից զրկուելով... Այդ գիւղի եկեղեցին վկայում է, որ մի ժամանակ ունեցել է իւր ծոցում հարազատ հայորդիներ...»³: Յօդուածագիրը նշում է, որ ժամանակին գիւղը պատկանելիս է եղել Սուլթանեան բէկերին: Նրանք ցանկացել են հպատակեցնել գիւղացիներին, սակայն Յարութիւնեանների յամառ ջանքերի շնորհիւ գիւղն աստիճանաբար ազատուել է նրանցից: Հայաստանի ազգային արխիւում պահպանուած Խոգնավար գիւղի ծխամատեաններից մէկում գրառումներ կան վերը նշուած Սուլթանեան բէկերի մասին. «Подвластные Асады Султан Гамза»⁴ ենթավերնագրի տակ ներկայացնում է գիւղացիների ցանկ, ովքեր ապրում էին նրանց ենթակայութեան տակ: Անդրադառնալով գիւղի վիմագրական ժառանգութեանն ու յուշարձաններին՝ նշենք, որ Խոգնավարի տարածքում պահպանուած հնագիտական յուշարձաններն են.

1. Գիւղից 700 մ հիւսիս արեւմուտք գտնուող դամբարանադաշտ (Ք. ա. 1 հազ.);
2. Սբ. Մինաս եկեղեցի (1675 թ.);
3. Սբ. Հռիփսիմէ եկեղեցի;
4. Խաչեր կոչուող սրբատեղի:

Սուրբ Մինաս եկեղեցի. Խոգնավար գիւղի յուշարձանների շարքում իր բացառիկ

¹ Թ. Խ. Յակոբեան, Ստ. Տ. Մելիք-Բախշեան, Հ. Խ. Բարսեղեան, Հայաստանի եւ յարակից շրջանների տեղանունների բառարան, հ. 2. Դ – Կ, 1988, էջ 762:

² Ս. Խանգաղեան, Հայրենապատում, հ. 1, Երևան, 1980, էջ 469:

³ Ս. Սպանդարեան, Թղթակցութիւններ, Նոր Դար, Թիֆլիս, 1890, հմր 72, էջ 3-4:

⁴ Հայաստանի ազգային արխիւ, ֆոնդ 93, ցուցակ 1, գործ հմր 74, (այսուհետ ՀԱԱ):

տեղն ունի գիւղամիջեան կիսաւեր եռանաւ, բազիլիկ եկեղեցին, որը վնասուել է 1931, ապա 1968 թթ. երկրաշարժերի հետեւանքով: 1974-ին մեծ հեղեղ է եղել, որի հետեւանքով կրկին փլուզումներ են եղել եկեղեցում⁵: Եկեղեցու կառուցման եւ անուան հետ կապուած վիմական արձանագրութիւններ չկան (գուցէ փլուածքի տակ են մնացել): Գիւղի յուշարձանները վիմագրական տեսանկիւնից երբեւէ չեն քննուել, ուստի եղածը նախկինի հետ համեմատելու հնարաւորութիւն չունենք, որպէսզի հասկանանք որքանով է պահպանուել վիմագրական ատաղձը, հետեւաբար կը բաւարարուենք մեր ձեռքի տակ եղած վիմագրերով՝ փորձելով որոշակի եզրայանգումների գալ: Տեղացիների վկայմամբ եկեղեցին կոչուում է Սբ. Մինաս, մինչդեռ մատենագիտութեան մէջ այն պահպանուել է Սուրբ Ստեփանոս Նախավկայ անուամբ: Խոզնավար եւ Խնածախ գիւղերում ընդօրինակուած ձեռագրերը թոյլ են տալիս պնդելու, որ նրանք հանդիսացել են Քաշաթաղ գաւառի գրչօջախներից: Այսպէս, 1488 թուականի մի Աւետարանում, կարդում ենք. «Արդ գրեցաւ սուրբ Աւետարանս ի թվականութեանս Հայկազեան տումարի ԶԼԷ 1488, ի հայրապետութեան տեառն Սարգսի, ի յաթոռակալութեան Սիւնեաց Որդանան վարդապետի... Եւ գրեցաւ ի գաւառիս Քաշաթաղուց, ի գէղս, որ կոչի Խոզնավար, ընդ հովանեաւ Սուրբ Ստեփանոսի Նախավկայիս...»⁶:

Իսկ Գրիշ Եղիա երեցի ընդօրինակած մյուս Աւետարանում. «Արդ գրեցաւ սուրբ Աւետարանս ի թվականիս ԶԼԹ 1490, ի գաւառիս Քաշաթաղուց, ի գեղոյս, որ կոչի Խոզնավար, ընդ հովանեաւ Սուրբ Ստեփանոս Նախավկայիս և այլ բազմահավաք սրբոցն, որ աստ կան...»⁷:

Մեկ ուրիշ Աւետարանում, որն ընդօրինակել է Միքայէլ Սարկաւազը, կարդում ենք. «Աստուած իւր վարձն հատուցանէ աստ եւ անդ, որ կամակից եղել գրելոյ սբ. Աւետարանիս... ի յԱստուածաբնակ եւ յանառիկ դղեակս Քաշաթաղ, ի գօղն Խոզնավար, ընդ հովանեաւ Սրբոյն Ստեփանոսի Նախավկային... ի թվաբերութեանս Հայոց ՌՃԱ (1652)»⁸:

Այսպիսով, գրաւոր աղբիւրները վկայում են, որ ներկայիս Սբ. Մինաս եկեղեցին նախկինում կոչուել է Սբ. Ստեփանոս Նախավկայ: Հաւանաբար, այն անուանափոխուել է վերջին նորոգումից յետոյ՝ 1675 թուականին: Ամէն դէպքում տեղացիներին յայտնի չէ յուշարձանի Ստեփանոս Նախավկայ անուան տարբերակը: Անուանափոխութեան հանգամանքը հաւանական վերանորոգումից յետոյ հանդիպում ենք նաեւ Ալիշանի հետեւեալ տողերում. «Խոզնավար կամ Խազնավար, գիւղ, որ թեպետ ոչ է յիշեալ ի հին Յուցակին... և ի յիշատակարանի աւետարանի գրելոյ աստ յամի 1490 ասի լինել ի գաւառս Քաշաթաղուց և եկեղեցին Սբ. Ստեփանոս Նախավկայ, այժմ սուրբ Մինաս կոչի...»⁹ (նկ. 1):

Ստեփանոս անուան եւս մէկ յիշատակութիւն ենք հանդիպում Ս. Խանզադեանի հետեւեալ տողերում. «1974 -ին մեծ հեղեղ է եղել եւ շատ վնասներ պատճառել գիւղին: Փլուել է նաեւ Ստեփանոս Նախավկայ եկեղեցին, որ գիւղի մէջ է... Ես ճիգ եմ անում կարգալու հին եկեղեցու մաշուած պատի մաշուած քարերին մնացած գրերը. Սուրբ

⁵ Ս. Խանզադեան, նշ. աշխ., էջ 471:

⁶ Ժն դարի հայերէն ձեռագրերի յիշատակարաններ, մաս 3, կազմեց՝ Լ. Խաչիկեան, Երեւան, 1967, էջ 116:

⁷ Նոյն տեղում, էջ 148:

⁸ Նոյն տեղում, էջ 506:

⁹ Ղ. Ալիշան, Սիսական, Վենետիկ, 1893, էջ 268:

Ստեփանոս Նախավկայ. թվն ՌԾԱ...»¹⁰: Այդ արձանագրութիւնը, սակայն, ներկայումս տեղում չի պահպանուել:




Նկ. 1 Սուրբ Մինաս

Խոզնավար գիւղը յիշատակուում է նաեւ Խնածախի նշանաւոր մելիք Հայկազ Բ-ի կնոջ՝ Գուլաբի տապանաքարին պահպանուած արձանագրութեան մէջ. «...ԳՆԱՅ ԵՒ ՄԵՐ Հ[Ա.]ՅՐԵՆԻՔ Մ[ՈՒ]ԼՔԵՐՆ ԱՆԿԵ[Ա.]Լ ԷՐ Ի ՁԵՌ[Ա.]Յ, Թ[Ա.]Գ[Ա.]Վ[Ո.]ԲԷՆ Ղ[Ա.]Բ[Ա.]Լ[Ա.]Յ ԷԱՌ ԱՅՍՔ[Ա.]Ն ԳԵՂԻ: ԽՆ[Ա.]Ծ[Ա.]Խ, Պ[Ա.]Յ[Ա.]ՆԳ[ՈՒ]Ր, Խ[Ո.]ՁՆ[Ա.]Վ[Ա.]Ր¹¹: Ինչպէս երեւում է արձանագրութեան տողերից Հայկազի մահից յետոյ նա կարողացել է վերադարձնել ամուսնուց խլուած հայրական ժառանգութիւն մնացած մուլքերը եւ նշուած երեք գիւղերի հողային եւ հարկային իրաւունքներն ու սեփականութիւնը:

Այժմ ներկայացնենք եկեղեցու ցայժմ անտիպ արձանագրութիւնները.

1. Միւն. ընկած եկեղեցու հիւսիսային պատի տակ, երեսին եւ ձախակողմում երկուական տող (նկ. 2):



Արձանագրութեան մէջ յիշատակուող Տէր Ղազարը Խոզնավար գիւղի, Սբ. Մինաս եկեղեցու քահանայ Տէր Միլքումի որդին է (ով յիշատակուում է նոյն արձանագրութեան մէջ): Այս մասին հնարաւոր եղաւ ճշգրտել Հայաստանի ազգային արխիւի ծխական մատեաններից: Ստորեւ ներկայացնում ենք մի նամակ-խնդրագիր գիւղի ժողովրդի կողմից՝ ուղղուած Տաթևի հոգեւոր դասին: Այսպէս.

«10 փետրւորի 1872 ամի

Ի հոգևոր կառվրին հայոց Տաթևու

Ի հայ ազգի ժողովրդոց Խոզնավար գիւղի վիճակին Տաթևու

¹⁰ Ս. Խանգաղեան, նշ. աշխ., էջ 471:

¹¹ Մ. Հասրաթեան, Պատմա-հնագիտական ուսումնասիրութիւններ, Երևան, 1985, էջ 164:

Խնամիր.

Մէք իրիսուն տարւան ժողովուրդ իմք, ունիմք մի ծիրունի քահանայ Տր Միլքում Տէր Գրիգորիանց, այժմ յոթանասուն հասակ ունի: Ինքն դատաւարութիւն է ու աչքը լույսից պակասած... Տր Միլքումը այսուհետ ինչպէս նկատումիմք վիրաւորիալ պարճառներով չէր կարող զմեզ հովիւ անթիրի կիրպիւ ինչպէս մինչ ցայսօր: Սորա հիւր մատուցանիւով յուր հրաժարական թողթը աղաչիմք, խնդրիմք արժանատի տնորենուին ի տիրի քինայի որդի պարզ հոգութեան տնայի Զաւարին, որ հիմա իրիսուն ամայէ, ունի գովիւ վարք, բարք, մշտական սպասաւոր ԻՍ գիւղիս տուրք Մինաս իկիղիցոյն, ընտրուակ է և արժանի քահանայական աստիճանի: Կարարիւով միր էս խնայութեանը հոգևոր իշխանութեանը ըստ հոգոյս ըստ մարմնոյ կարարիւպէս կմխիթարէ»:

Այնուհետեւ նշում են գիւղացիների անունները, իբրեւ իրենց յօժար կամքով են ստորագրել խնդարի տակ եւ այսպէս գրում.

«Ճշմարիտ է որ յիշիալ անձինք յուրանց յօժար կամքնին ստորագրիլ, որուն վկայիմք կնիքով ու ստորագրութ. միրով»: **Տանուտէր:**

Կից ներկայացուում է Միլքում քահանայի հրաժարականի թուղթը: Այսպէս.

Հրաժարական թուղթ

«Էս Խոզնավար գիւղի ծիսական Միլքում քին Տր Գրիգորիանց այժմ 70 տարիական անձամբ ցաւաքար, վատարիս, առանց կարողութիւնից ընկած զկնի տասնութինգ տարի քահանայագործիւս, նկատում իմ, որ այսուհետ վիրագրիալ պարճառներով չէմ կարող կարարիւպէս անցիալ ժամանակաց նման յառաջ տանիլ իմ հովութեան պարտքս համաձայն բարքաւոր ժողովուրդ իմոյ ի Խոզնավար ցանկում Դաւար անուն որդոյ իմոյ ի քահանայ փոխանակ իմ հովու զնոյն ժողովուրդն, որ նոյն ժողովուրդն հաւանի իւր յիշիալ փառականաց յոյժամ իմ այս ուխտարարութեամբ պարտարիմ մինչև ցմահ հրաժարիլ մնալ ի քահանայագործութ. ի հաստատութ. ի խոստումս ստորագրիմ առաջինն է փետրվարի 1872 ամի ի գիւղն Խոզնավար»¹²:

Նամակի մէջ յստակ յիշատակուող Սբ. Մինաս անուանումը փարատեց եկեղեցու անուան հետ կապուած մեր տարակարծութիւնները: 1872 թուականին տեղի եկեղեցին արդէն յիշատակում է Սբ. Մինաս, նախկին Ստեփանոս Նախավկայ անուան փոխարէն:

2. Խաչքար. ագուցուած եկեղեցու հիւսիսային աւանդատան մուտքի վերնամասում, քիւին եւ ստորին հատուածներում մէկական տող (նկ. 3):



... ՐՈՍԻՆ



ԹՎ[ԻՆ] ՌԺԷ (1568):

¹² ՀԱԱ, 1849, ֆոնդ 93, ցուցակ 1, գործ 99:

Ծանոթ. Մասամբ պահպանուած արձանագրութեան սկզբնամասից պարզ է դառնում, որ ԲՈՍԻՆ վերջաւորութիւնը, հաւանաբար, անձնանուն շարունակութիւն է, այն կարող է լինել Մարտիրոս անձնանուն շարունակութիւնը:

3. Խաչքար. Հարաւային աւանդատան մուտքի վերնամասում, քանդակազարդ, առանց արձանագրութեան (նկ. 4):

Պէտք է նկատել, որ զոյգ աւանդատներին ագուցուած խաչքարերն օգտագործւած են որպէս շինաքարեր:

4. Պատրիարք եկեղեցու հարաւային պատին, վերնամասում՝ կամարազարդ քարի գլխամասում՝ մէկ տող (նկ. 5):



ՄԻՔ[ԱՅԵ]Լ Ք[Ա.]Հ[Ա.][ՆԱՅ]Ս Յ[Ի]Շ[Ե]Յ[Ե]Ք Ի ՔՍ

5. Խաչքար. ագուցուած եկեղեցու ենթադրեալ մկրտութեան աւազանի հիւսիսային պատին: Աւազանի վերնամասում՝ կամարազարդ քարի գլխամասում՝ մէկ տող (նկ. 6):


ՈՐԴԻ ՍԱՐՈՒ ԹՎ[ԻՆ] ՌՃ (1651):

Ծանոթ. Մասամբ պահպանուած արձանագրութեան վերծանութիւնը պահպանուել է վիմագրագէտ Գր. Գրիգորեանի դաշտային օրագրերից մէկում¹³:

6. Տապանաքար. եկեղեցու հարաւային պատի տակ, առանց արձանագրութեան, զարդաքանդակ, թուագրւում է 16-17-րդ դարերով (նկ. 7):

7. Տապանաքարի բեկոր. որպէս շինաքար ագուցուած պատի մէջ, վրան՝ ձիաւոր: Հաշուի առնելով քանդակային մանրամասները, կարելի է ենթադրել, որ դա 13-14-րդ դարերի տապանաքարի բեկոր է, որը բնորոշ է տուեալ ժամանակաշրջանին, յատկապէս Արցախում (նկ. 8):

8. Արձանագրութիւն. եկեղեցու հիւսիսային կամարաշարի սեան վրայ երեք տող (նկ. 9)¹⁴:



Մ[Ա.]Ս[Ե]ՀԻ ՈՐԴ[Ի] ՏԱՆՏԵՍԻՍ
ՈՐ Է ՍԱՐԳԵՍԵՆՅՍ ԶԻՇ[Ե]Յ[Ե]Ք Ի ՔՍ

Սբ. Հռիփսիմէ եկեղեցի: եկեղեցու գոյութեան մասին տեղեկանում ենք ինչպէս բանաւոր, այնպէս էլ սակաւ պահպանուած գրաւոր աղբիւրներից: Յայտնի է, որ այն

¹³ Գր. Գրիգորեան, դաշտային օրագիր (պահւում է Հնագիտութեան եւ ազգագրութեան ինստիտուտի արխիւում) էջ 52:

¹⁴ Լուսանկարը՝ հոգնավար գիւղի միջնակարգ դպրոցի ուսմասվար՝ Յարութիւն Անդրիյեանի:

հիմնովին քանդուել է 1935 թուականին, որի տեղում դպրոց է կառուցուել: Գիւղի ներկայիս դպրոցի ուսմասվար Յարութիւն Անդրիշեանի խօսքով Սբ. Հռիփսիմէ եկեղեցու տեղում կառուցուած դպրոցն այժմ չի գործում, սակայն շինութիւնը պահպանուել է: Նշում է նաեւ, որ շէնքի պատերի մէջ՝ թափուած ծեփի տակ, նշմարուել են խաչքարի եւ տապանաքարերի բեկորներ, որոնք թոյլ են տալիս ենթադրելու, որ դպրոցը կառուցելու ժամանակ եկեղեցու քարերի մեծ մասն օգտագործուել են որպէս շինաքար:



Եկեղեցու տեղում կառուցուած դպրոցը:

Գերեզմանատուն. 19-րդ դար. գտնուում է գիւղի հիւսիս արեւելեան մասում: Ուշագրաւ են գերեզմանատան տապանաքարերի քանդակները (**Ճկ. 10, 11**):

Խաչեր սրբատեղի: Գտնուում է գիւղից մօտ երկու կիլոմետր արեւմուտք՝ սարալանջի վրայ: Թարմ մոմի հետքերը, ինչպէս նաեւ տարածքի խնամուած լինելը թոյլ է տալիս ենթադրելու, որ սրբավայրը այցելուների ուշադրութեան եւ հոգացութեան կենտրոնում է (**Ճկ. 12**):

Թեւառոր խաչքար. գտնուում է գիւղից 300 մ հիւսիս-արեւմուտք՝ Բազարխանա կոչուող վայրում (**Նկ. 13**):

Այսպիսով, կարելի է ենթադրել, որ գիւղի եկեղեցին մինչեւ 17-րդ դարի կէսը, հաւանաբար, եղել է վանք եւ հանդիսացել է գրչութեան կենտրոն: 17-18-րդ դարերում անուանափոխուել է Սբ. Ստեփանոսից Սբ. Մինասի՝ վերածուելով ծխական եկեղեցու: Քաջաթաղի շրջանի արձանագրութիւնները, յատկապէս ուշ միջնադարեան հերթական անգամ հերքում են Քաջաթաղի 17-18-րդ դարերում իսպառ հայաթափուած լինելու հանգամանքը: Ուստի շրջանի վիմագրերի ուսումնասիրութիւնը կրկին ապացուցում է Քաջաթաղի բնիկ հայկական լինելու փաստը: Ամփոփելով նշենք, որ եկեղեցու տարածքում՝ փլուածքի տակ, պահպանուել են տասնեակ տապանաքարերի բեկորներ: Եկեղեցին եւ շրջակայքը կարօտ են մանրազննին հետազօտութեան, ինչի շնորհիւ ի յայտ կը գան նոր վիմագրեր, որոնք կ'ամբողջացնեն մեր ուսումնասիրութիւնը:



նկ. 2



նկ. 3




նկ. 4



նկ. 5



նկ. 6





նկ. 7



նկ. 8



նկ. 9



նկ. 10, 11



նկ. 12



նկ. 13

ՄԱԹԵՆԻԿ ԽՈՒՐՇՈՒԴԵԱՆ

ՀՀ ԳԱԱ Հնագիտության եւ ազգագրության ինստիտուտ